

06 DEC 2000

Howard-Malaysia

MALAYSIA PENTING KEPADA AUSTRALIA, KATA JOHN HOWARD

KUALA LUMPUR, 6 Dis (Bernama) -- Perdana Menteri Australia John Howard berkata Canberra memandang hubungan dengan Kuala Lumpur penting tetapi menekankan hubungan kukuh antara Australia dan Malaysia terjalin jika ia berasaskan kepada saling hormat menghormati.

"Saya selalu menekankan dalam hubungan luar hubungan kukuh akan terjalin jika ia berasaskan saling hormat menghormati," katanya dalam temu bual dengan stesen radio Australia di Canberra hari ini.

Beliau ditanya jika masalah dengan Indonesia atau lebih tepat, sensitiviti dengan Jakarta dan Malaysia menambah kepada ketegangan di rantau ini. Transkrip temu bual itu telah diperolehi oleh Bernama.

Howard berkata adalah adil untuk menyatakan "saya pernah dikritik oleh Perdana Menteri Malaysia".

"Bagaimanapun, hubungan rakyat dengan rakyat antara Australia dan Malaysia, hubungan perniagaan dan hubungan kebudayaan adalah kukuh," katanya.

Australia dan Malaysia juga mempunyai "tidak persefahaman" dalam beberapa isu. Pada 21 Jun tahun ini, setiausaha kepada Kabinet Australia, Paul McClintock yang mengadakan lawatan ke sini, dipetik sebagai berkata, beliau bimbang dengan perbezaan pendapat antara Howard dan Perdana Menteri Datuk Seri Dr Mahathir Mohamad.

Greg Sheridan, editor luar negara akhbar "The Australian" yang menemu bual Dr Mahathir di Kuala Lumpur baru-baru ini, melaporkan Dr Mahathir nampaknya bimbang berikutan Howard telah "menukar sikap" dari persahabatan kepada kritikan.

"Pada awalnya, sudah tentu, beliau (Howard) ingin bersahabat dan saya bersikap terbuka," Dr Mahathir dipetik mengulas kenyataan Howard terdahulu, yang mana perdana menteri Australia itu menyifatkan memenjarakan bekas timbalan perdana menteri Datuk Seri Anwar Ibrahim kembali kepada autokratif.

Ditanya jika Australia dianggap sebagai "bola hitam" oleh Malaysia and Indonesia daripada menjadi anggota blok perdagangan, apa yang dipanggil Asean campur tiga (Jepun, China dan Korea Selatan) Howard berkata: "Pada masa ini, kami tidak dijemput untuk menyertainya, tetapi ia mungkin berubah kemudiannya, dan sementara itu kami mencari pilihan lain."

Ditanya jika ia akan menjejaskan kepentingan ekonomi Australia, Howard berkata: "Saya tidak tahu dalam jangka masa pendek ia akan menjejaskan, tapi dalam jangka masa panjang ia mungkin berubah."

"Anda perlu sentiasa fleksibel, membuat pandangan jauh, dan pada masa yang sama mengambil peluang yang ada," katanya.

Memberi contoh, Howard berkata Australia sedang merundingkan perjanjian perdagangan bebas dengan Singapura.

"Kami terbuka kepada perjanjian perdagangan bebas yang lain yang bersesuaian dengan matlamat jangka panjang perdagangan pelbagai hala kami," katanya.

Howard berkata Australian berharap mempunyai hubungan dengan tidak hanya Asia Pasifik, "yang amat penting kepada kami", tetapi juga dengan Eropah dan Amerika Utara.

--BERNAMA

ES ES RI